

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju (“Službeni glasnik BiH”, broj 2/05) i člana 16. Pravilnika o licencama – prečišćeni tekst (“Službeni glasnik BiH”, broj: 63/16), Državna regulatorna komisija za električnu energiju, na sjednici održanoj 11. oktobra 2017. godine, donijela je

## **ODLUKU**

### **O IZDAVANJU LICENCE ZA TRGOVINU I SNABDIJEVANJE ELEKTRIČNOM ENERGIJOM NA TERITORIJI BOSNE I HERCEGOVINE**

1. Izdaje se licenca Javnom preduzeću za komunalne djelatnosti “Komunalno Brčko” d.o.o. Brčko Distrikt BiH, za trgovinu i snabdijevanje električnom energijom na teritoriji Bosne i Hercegovine.
2. Licenca iz tačke 1. ove odluke izdaje se za period od 1. novembra 2017. godine do 31. oktobra 2022. godine i koristi se u skladu sa Uvjetima za korištenje licence za trgovinu i snabdijevanje električnom energijom na teritoriji Bosne i Hercegovine.
3. Sastavni dio licence su Uvjeti za korištenje licence za trgovinu i snabdijevanje električnom energijom na teritoriji Bosne i Hercegovine.
4. Ova odluka stupa na snagu danom donošenja, a dispozitiv odluke bit će objavljen u “Službenom glasniku BiH” i službenim glasilima entiteta i Brčko Distrikta Bosne i Hercegovine.

### ***Obrazloženje***

Javno preduzeće za komunalne djelatnosti “Komunalno Brčko” d.o.o. Brčko Distrikt BiH (u daljem tekstu: podnosilac zahtjeva), koje je shodno *Odluci o osnivanju javnog preduzeća “Komunalno Brčko” d.o.o., Brčko Distrikt BiH* (“Službeni glasnik BD BiH”, br. 20/07, 21/07, 24/08 i 33/09), dužno omogućiti distribuciju električne energije, te vršiti snabdijevanje korisnika sistema i kupaca električnom energijom na svom području djelovanja, vlasnik je licence za trgovinu i snabdijevanje električnom energijom na teritoriji Bosne i Hercegovine, upisane u Registar licenci kod ove Komisije pod registracijskim brojem: 05-28-12-413-30/12 od 17. januara 2013. godine, čije trajanje istječe 31. oktobra 2017. godine.

Saglasno pravu da koristi mogućnost obnove licence i ispunjavajući obavezu iz člana 48. Pravilnika o licencama – prečišćeni tekst (“Službeni glasnik BiH”, broj 63/16) da prije isteka važnosti posjedujuće licence, izrazi svoju namjeru da djelatnost trgovine i snabdijevanja električnom energijom na teritoriji Bosne i Hercegovine nastavi i dalje obavljati, vlasnik licence je podnio zahtjev za izdavanje nove licence koji je zaprimljen pod brojem: 05-28-12-223-1/17 od 27. juna 2017. godine. O podnijetom zahtjevu odlučuje se u skladu sa internim pravilima i propisima DERK–a i shodno članu 7. Zakona o prijenosu, regulatoru i operatoru sistema električne energije u Bosni i Hercegovini.

Zahtjev je podniet na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnieti uz zahtjev ili predloženi naknadno na zahtjev DERK–a, omogućili DERK–u da razumije, razmatra i odlučuje o podnijetom zahtjevu o čemu je DERK obavijestio podnosioca zahtjeva svojim aktom broj: 05-28-12-223-3/17 od 26. jula 2017. godine.

Po pregledu i provjeri svih formalnih elemenata zahtjeva DERK je najprije 2. augusta 2017. godine objavio u dnevnim novinama i na svojoj internet stranici kratku obavijest za javnost

sumirajući zahtjev za licencu i odredio rok do 9. augusta 2017. godine za dostavljanje komentara javnosti na podnijeti zahtjev za izdavanje licence.

DERK konstatira da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješača.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja djelatnost trgovine i snabdijevanja električnom energijom na teritoriji Bosne i Hercegovine jer su njegove tehničke, pravne i finansijske mogućnosti permanentno potvrđivane prethodnih godina korištenja licence u toku kojih je o tome pružao valjane dokaze.

Nadzor svih aspekata usklađenosti dosadašnjeg djelovanja podnosioca zahtjeva sa uvjetima i kriterijima za obavljanje djelatnosti trgovine i snabdijevanja električnom energijom na teritoriji Bosne i Hercegovine dao je osnova DERK-u da pristupi obnovi licence, odnosno pripremi početne verzije Uvjeta za korištenje licence koja bi, takođe, važila više godina. Ovaj dokument je od 8. septembra 2017. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 13. septembra 2017. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

S obzirom da su na održanoj općoj raspravi izostali bilo čiji komentari koji su mogli utjecati da neki od uvjeta za korištenje licence budu uređeni na drugačiji način, pripremljen je prijedlog da se zatražena licenca izda i dostavljen podnosiocu zahtjeva aktom DERK-a broj: 05-28-12-223-14/17 od 19. septembra 2017. godine. Kako se shodno članu 16. stav 2. Pravilnika o licencama – prečišćeni tekst, na održanoj općoj raspravi, ovlašteni predstavnik podnosioca zahtjeva odrekao prava na dostavljanje komentara, bilo je osnovano zaključiti da se prijedlog DERK-a smatra sačinjenim u skladu sa pozitivnim zakonima i podzakonskim propisima Bosne i Hercegovine koji reguliraju predmetnu materiju.

Pošto je pregledom statusa primjene svih komponenti koje su odlučujuće za dodjelu licence dobio uvjerljive pokazatelje da podnosilac zahtjeva ima osigurane resurse, organizirane uvjete i utvrđene profesionalne standarde da nastavi obavljati istu djelatnost, priklanjajući se principu postepenosti u određivanju trajanja važenja ove licence, prije nego iskoristi pravo da je istom subjektu izda u maksimalno dopuštenom periodu korištenja, DERK je odlučio kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u BiH, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema ove odluke.

Broj: 05-28-12-223-16/17

11. oktobra 2017. godine

Tuzla

Predsjedavajući Komisije

Nikola Pejić